



## Dubèrtes es inscripcions entara II Trail Vielha-Molières

Damb era arribada deth nau an comence eth compde entà darrèr entara **naua edicion dera Trail Vielha-Molières 3010**, qu'aurà lòc eth **14 de junhsèga** e qu'enguan se presente damb ua **nauetat: era corsa Tuca Trail**.

**A compdar d'aué, 10 de gèr, dejà son dubèrtes es inscripcions ena [web dera corsa](#) entà aguesta dusau edicion dera Trail Vielha-Molières**, que compde damb un totau de **1.200 places repartides entre es tres carrères**: era **Maraton de Molières**, era **Montpius Skyrace** e era naua **Tuca Trail**.

Es inscripcions **demoraràn dubèrtes enquia aumplir totes es places enquiath 10 de junhsèga**. Ath delà, enguan era organizacion a decidit premiar as **100 prumèrs/es s'inscriti/es damb un 10% de descompde** en quinsevolh des tres distàncies.

Es **prètz** des inscripcions vàrien segontes era corsa: era **Maraton Molières còste 46 euròs**, mentre qu'era **Montpius Skyrace 26** e era **Tuca Trail 11 euròs**.

Segontes afirme eth Baile de Vielha e Mijaran, **Juan Antonio Serrano**, "èm **fòrça contenti d'organizar amassa damb eth Centre Trail Val d'Aran e damb Centre Excursionista d'Aran aguesta dusau edicion**. Er Ajuntament de Vielha e Mijaran contunhe en tot apostar per aguesta carrèra e pròva d'açò son es recorsi que destinam entà que sigue tot un èxit, damb er objectiu de **plaçar en Vielha e Mijaran e a tota era Val d'Aran coma er epicentre des espòrts de montanha** e coma un lòc idonèu entara realizacion d'eveniments esportius".

**IMATGE: TRAIL VIELHA-MOLIÈRES**

**Informa:**  
Clara Villar

10/01/2018

**Galeria:**



**ESPORTS**

[Vielha](#)